

1 Jon

Naloḅulat napisulan na-və^{ha-sual-an} aJon totosi

Ase itos naloḅulat egai?

AJon tovi ahai susur siYesu, gai itosi.

AJon itos naloḅulat egai hən nəsa?

Itosi hən ɸeṽusan alat siYesu hən naṽide hən ləḅitoh, ɸon mai aGot mai nəvanuan tile gail.

AJon itos naloḅulat m̄os ase?

Itosi van hən alat lotokad nadələmian len aYesu Kristo len naut ɸisi.

AJon itos naloḅulat ɸais?

Hum ma totosi len nasihau A.D. 90.

1) Na-ke-ivoi-an (1.1-4)

2) Samteləmas naṽide tosa alat navile a pan lotokade. Mititoh tinor hən naṽusanan se-Nunun aGot, husur aGot ivoi ɸisi (1.5-2.27)

3) Datimasveveu buni, ləmas bun gidat gabag, riḅ gat nəlodato len aKristo. Datimasbunus kitev naṽusanan sihai ɸusan gail ke evi kitinan o eḅuer. Datḅigol ɸimagenan, datoləḅoi datḅehəḅaṽur len nəhon aKristo len natələmaman san (2.28-4.6)

4) Datimasləmas bun gidat gabag hən datḅeləḅoi ke datutoh len naṽide tonor hən nəboruan siGot. Datimasgol timagenan husur aNunun aGot ikel koti ke aYesu egəm hən datḅikad nəmauran vi sutuai (4.7-5.12)

5) Nə-maris-kotovi-an (5.13-21)

Na-ke-ivoi-an

¹ Ginau notos nalobulat egai van hən gamito husur naSoruan hən nəmauran* totoh tia len natubatan.* Namtosəsəlon hən, namtorisi. Evoi, namtorisi hən namətanamito, namtubari hən navəlanamito.

² AGot igol ke nəmauran tovisi, ale ginamit namtorisi, namtukel kot nakitinan husuri. Namtukel ur nəmauran vi sutuai mai gamito, nəmauran vi sutuai totah mai aTata. Ale aTata igol tovisi hən ginamito.*

³ Namtukel ur nəsa namttorisi mai nəsa namttosəsəlon hən mai gamito, hən gamit am mətbeləboi mətbikad nəbonan mai ginamito. Avil nəbonan sidato dattokade, datukade mai aTata mai aNatun tovi aYesu Kristo.

⁴ Namtutos natgalenan hən ləbbigol nəlonamito tepul səsəhov hən nakemkeman.

AGot evi namial, toh len namial

⁵ Ale egai evi napisulan namttosəsəlon hən len gai. Gai ikele ale namtukel uri mai gamito maiegai ke: aGot evi mial; səkad nəmargobut ideh lan.

⁶ Datbikele ke dattokad nəbonan maii tia be datbiyar len nəmargobut sal, datoliblibon, nəmauran sidato saʋusan nakitinan.

⁷ Avil datbiyar len namial sumian aGot, totoh len namial, datukad nəbonan mai gidat gabag ale nəda hiYesu, aNatun, ekəkas gidato hən bilav kuv nəsaan sidato. Igol gidato datuveveu len nəhon.

⁸ Datbikele ke datsəkad nəsaan ideh, datogəras gidat gabag, ale nakitinan eʋuer len gidato.

* **1:1:** Nəbon aJon tosor husur naSoruan hən nəmauran, isor husur aYesu Kristo. * **1:1:** Jon 1.1 * **1:2:** Jon 1.14

⁹ Be datbikel vøhot nakitinan høn nəsaa sidato, dereh aGot teruβat nəsaa sidato, tigol dativeveu dan nañide tosa p̄isi. Igol natgalenan husur ke akis igol nəsa tokele, akis igol nəsa tonor.*

¹⁰ Datbikele ke datsagol nəsaa, datorin̄ nəhes len aGot ke tovi Nəvanuan Nalibliboŋan, ale nasoruan san eβuer len nəlodato.

2

¹ Tuhnaturgw gail len nadəlomian, nutos natgalenan van høn gamito høn asike mət̄bigol nəsaa. Avil gidat ideh ðigol nəsaa, datukad avan sua tosor m̄os gidato len nəhøn aGot Tata, tous aTata høn βeruβat nəsaa sidato, nahəsən aYesu Kristo, gai tonor buni.

² Gai etutumav høn nəmauran san gabag høn datbikad naruβatian dan nəsaa sidato. Be savi gidato ŋai, igole m̄os alat navile a pan kavkav.*

³ Ale dateləboii ke datoləboi aGot mabe? Gidat datðigol nəsa gai tokele, datoləboii.

⁴ Avan ideh ðike, “Noləboi aGot, novi esan,” be sagol nəsa aGot tokele, atenan evi nəvanuan nalibliboŋan, ale nakitinan səpat lan.

⁵ Be gidat ideh dattogol nəsa aGot tokele, len nəlodat kavkav datoləmas bun aGot. Len nañide tomaienən datoləboi buni ke datutoh len gai.

⁶ Datbikele ke datutoh tin len aGot, datimastoh husur nañide aYesu tokade len nəmauran san.

Datimasləmas bun gidat gabag

⁷ Gamit notoləmas bun gamit p̄isi, nəsatos nakelean veveu todaŋ van høn gamito. Ao, evi nakelean todaŋ ta sutuai mət̄tokade len natuβatan.

* **1:9:** Psa 32.1-5 * **2:2:** Rom 3.25-26

Nakelean egai todaŋ evi nasoruan mættosæsəlon
həni tia.*

⁸ Avil tarhəte, evi nakelean veveu todaŋ nototosi
gagai van hən gamito husur nakitinan han evisi
len nəmauran səKristo, ale len nəmauran samito.
Husur nəmargobut satovan vəmasig ale namial
kitin etuʔat tia hən tomial.

⁹ Gidat ideh bikele ke totoh len namial, avil
bəmətahun bun nəbathudud nadəlomian ideh san,
gai itoh sal len nəmargobut.*

¹⁰ Avil gidat ideh bələmas bun nəbathudud
nadəlomian ideh san, gai itoh tin len namial,
ale səkad natideh len nəlon togol avan ideh bipes
həbetw, teh len nəsaan.

¹¹ Be gidat ideh bəmətahun bun nəbathudud
nadəlomian ideh san, gai itoh len nəmargobut, iyar
len nəmargobut, ale etətan hən naut tovi lan, husur
nəmargobut igol namətan iʔesw.

¹² Nutos nategai van hən gamit atuhnətugw gail,
husur nəsaan samit gail lumaruʔat bathut
nəsa aYesu togole mōs gamito.

¹³ Nutos nategai van hən gamit atata gail,
husur ke mættoləboi tia aKristo totoh tia len
natuʔatan.*

Nutos nategai van hən gamit nəmantuhmar gail,
husur ke len nəbalan mai atenan tosa vəsa tovi
təmat, mətowin tia.

¹⁴ Nutosi van hən gamit atuhnətugw gail
husur mətoləboi aTata.

Nutosi van hən gamit atata gail

* **2:7:** Jon 13.34 * **2:9:** Len alat siYesu, galevis lokis galit gabag
hən aKristen, be ləbəmətahun naKristen gail am, logəras galit gabag
ke lotovi Kristen * **2:13:** Jon 1.1

husur mətələboi tia ategaii totoh tia len natuḅatan.

Nutosi van hən gamit nəmantuhmar gail,

husur mətudaŋ, mai nasoruan siGot ipat tabtab len gamito,

ale len nəḅalan mai atenan tosa vəsa tovi təmat, mətowin tia.

¹⁵ Samteləmas bun naḅide sinavile a pan mai natit gail sinavile a pan. Husur mətḅeləmas bun naḅide mai natit gail sinavile a pan, mətsaləmas bun aGot Tata.

¹⁶ Bathut natit ḅisi len navile a pan, na-ləḅon-masuḅ-həni-an hən nibemito, na-ləḅon-masuḅ-həni-an hən namətamito, naḅivan len na-pul-hən-natite-an, natgalen ḅisi ləsagəm len aTata, ao logəm len navile a pan egai tosa.

¹⁷ Ale navile a pan mai naləḅonian san gail lotosa, gagai ivan van vəmasig; avil avan ideh togol naləḅonian siGot, itoh tin van vi sutuai.

Aenemi seKristo gail

¹⁸ Anatugw gail, namityal naməkot hən navile a pan egəm pəpadaŋ. Mətosəsəloŋ həni tia ke avan sua tovi enemi seKristo dereh tegəmai, ale gagai nəvanuan tosoḅur lotovi enemi seKristo lovisi tia. Husur natgalenan, datoləboii ke gagai evi namityal naməkot hən navile a pan.*

¹⁹ Nəvanuan galenan luvan dan gidato dattovi siYesu, be ləsavi gidat ideh; husur lətavi gidat ideh, lətətah mai gidat sal. Be husur ke lotovan, eḅusani ke ləsavi gidat ideh.

* **2:18:** Mat 24.5, 23-24; Mak 13.21-22

²⁰ Avil gamito, aKristo eviol hən aNunun mai gamito ale gamit p̄isi mətöləboi nakitinan.

²¹ Mətunau ke nutos nategai van hən gamito husur ke mətosaləboi nakitinan a? Ao. Nutosi husur ke mətöləboi nakitinan, mətöləboii ke naliboŋan p̄isi ləsagəm len nakitinan.

²² Nəvanuan nalibliboŋan evi ase? Evi nəvanuan tomətahun b̄ike aYesu tovi aKristo, ikele ke aYesu savi aKristo, aGot sətatabuh lan. Nəvanuan enan evi enemi seKristo, ike aGot savi aTata mai aYesu savi aNatun, emətahun gəlar p̄isi.

²³ Avan ideh tomətahun aNatun aGot, gai sətah mai aTata am. Be avan ideh tokel uri ke tovi siNatun aGot, gai itah mai aTata am.*

²⁴ Nəsa mət̄tosəsəloŋ həni len natuβatan hən nəmauran mət̄tokade len aKristo, mitimastəgau gati len nəlomito. Mət̄betəgau gat nəsa mət̄tosəsəloŋ həni len natuβatan, dereh gamit am mititoh tin len aNatun aGot mai aTata.

²⁵ Ale ikel gat na-kel-gati-an egai ke: dereh tigol datikad nəmauran vi sutuai.

²⁶ Nutos natgalenan van hən gamito, nutos husur alat lotoke ləbегəras gamito.

²⁷ Be gamito, aYesu eviol hən aNunun aGot mai gamito, gai itoh tin len gamito gol ke mət̄sañidol len naṗusanan ideh hən avan ideh am b̄eṽusan gamito. Evi aNunun aGot toṽusan gamito hən nakitinan husur natit p̄isi; nəsa toṽusan həni evi nakitinan, savi naliboŋan. Sum̄an ke toṽusan gamito, toh tin len aKristo.

²⁸ Evoi, anatugw gail len nadəlomian, mititoh tin len aKristo, hən ke nəboŋ b̄etəlmam asike dat̄bikad

* **2:23:** Mat 11.27; Jon 5.23, 15.23

nə-lon-uri-an, asike datbikad namətahwan, asike nahurudat bisa len nəhon.

²⁹ Mətbeləboii ke aGot tonor, mətələboii am ke nəvanuan p̄isi lotogol nanoran, nəpasian salito egəm len aGot.

3

Anatun aGot gail

¹ Məteris na-ləmas-buni-an aTata toviol masuṽ həni mai gidato, hən gai b̄ekis gidato hən anatun gail. Ekitin, datovi anatun aGot gail!* Imagenan, nəvanuan navile a pan ləsələboi gidato, bathut ke ləsələboi aGot.

² Gamit notoləmas bun gamit p̄isi, gidato datovi anatun aGot gail tia, be dereh dategəm sum̄an nəsa? Datsələboi, savisi sal. Avil datoləboii ke nəboŋ aKристо b̄evisi, dereh datesum̄an gai husur dereh dateris p̄ar p̄ar həni hum gai kitin.

³ Ale gailit p̄isi lotokad nə-vatvat-viri-an hən ləb̄eris maien həni, lotəgau gat tabtab hən naveveuan hən nəlolit gabag sum̄an ŋai aKристо toveveu.

⁴ Avan ideh togol nəsaan eḅur kotov nalo siGot husur nəsaan evi na-ḅur-kotov-nalo-an.

⁵ Ale mətələboii ke aKристо evisi hən b̄ilav kuv nəsaan gail. Mətələboi gai səkad nəsaan ideh lan.

⁶ Nəvanuan p̄isi lototoh tin len gai ləsagolgol nəsaan; nəvanuan p̄isi lotogolgol nəsaan, ləsarisi boŋ ideh, ləsələboii.

⁷ Tuhnaturgw gail, avan ideh sategəras gamito. Nəvanuan togolgol nəsa tonor, inor, hum aKристо tonor;

* **3:1:** Jon 1.12

⁸ avan ideh togolgol nēsaan, gai evi setəmat husur natəmat igolgol nēsaan len natuḅatan van vəbar daməṅai. Bathut natenan, aNatun aGot evisi mōs bəmədās nauman gail setəmat hən ləḅimasig.

⁹ Nəvanuan p̄isi lotokad nəpasian salito len aGot, ləsagolgol nēsaan am husur nəḅoruan siGot ipat len nəlolito, iṽan hum namisurhuhai toṽan, gol lodədās ləḅigol nēsaan bathut lukad nəpasian len aGot tolav nəmauran mai galito.

¹⁰ Anaton aGot gail lotile len anaton natəmat gail maiegai ke: nəvanuan p̄isi ləsagolgol nanoran, mai nəvanuan p̄isi ləsaləmas bun nəbathudud nadələmian ideh salito, lovi setəmat, ləsavi siGot.*

¹¹ Imaienan, egai evi nasoruan məttoṣəsəloṅ həni len natuḅatan ke: datimasləmas bun gidat gabag.*

¹² Sadatesum̄ian aKen tovi sitenan tosa vəsa masuṽ tovi təmat. Sadatesum̄ian aKen, gai togol Apel, aṽan, tomat.* Ale aKen igole imat sil nēsa? Igole bathut natgalenan aKen togole lusa vəsa, be natgalenan aṽan togole lunor.

¹³ Imaienan bathudud nadələmian, alat navile a pan ləḅemətahun bun gamito, samtesəhoṽut len na-mətahun-buni-an salito.*

¹⁴ Datoləboii ke dattomakuv dan nəmatan vāḅis len nəmauran tia bathut ke dattoləmas bun nəbathudud nadələmian.* Avan ideh saləmas bun galito, gai səmakuv dan nəmatan sal.

* **3:10:** Len alat siYesu, galevis lokis galit gabag hən aKristen, be asike ləḅeləmas bun naKristen gail am, logəras galit gabag ke lotovi Kristen. * **3:11:** Jon 13.34 * **3:12:** Gen 4.1-8 * **3:13:** Luk 6.22; Jon 15.18-19, 17.14 * **3:14:** Jon 5.24

15 Galit ideh tomətahun bun nəbathudud nadələmian ideh evi nəvanuan na-gol-nəmatan, ale hum məttoleboii, nəvanuan na-gol-nəmatan səkad nəmauran vi sutuai lan.

16 Datoleboii tia ke na-ləmas-buni-an imaiegai ke: aYesu Kristo eviol kəmas hən nəmauran san mōs gidato; imaienan, gidat m̄au, datehəhaʋur hən datbeviol hən nəmauran sidato mōs nəbathudud nadələmian.

17 Avan ideh topul hən natite sinavile a pan, toris nəbathudud nadələmian ideh topar tit hən bimaurlan, ale asike nəlon bitan̄jisi, imabe? Gai ikad naləmas-buni-an siGot len nəlon a? Aoa!*

18 Tuhnaturgw gail, sadateləmas bun gidat gabag hən nasoruan o nəsa datbikele ŋai, be dateləmas bun gidat gabag len nakitinan mai len nəsa datbigole.

19 Datbeləmas bun gidat gabag maienan, dereh dateləboii ke dattovi sinakitinan; dattovi siGot tovi nakitinan. Imaienan dereh nəlodat tikad natəmat len nəhon aGot,

20 naut kəmas nəlodat tokel mai gidat səbodato ke datimaspanis. Husur aGot esəhor masuʋ hən nəlodato, gai eləboi natit p̄isi.

21 Gamit, notoləmas bun gamit p̄isi, asike nəlodato səbodat bikel mai gidat ke datbipanis, be nəlodat bimasil, datukad na-il-ḅuri-an hən datbeil len nəhon aGot.

22 Ale dereh aGot teviol hən natideh datbeusi həni, husur datugol nəsa gai tokele, datugol natit gail lotogol gai tohəhaʋur.

23 Ale nakelean todaŋ san ekəmaiegai ke: Datimaskad nadələmian len nahəsən aNatun tovi aYesu

* 3:17: Deu 15.7-8

Kristo, datimasriņ nēlodato lan. Ale datimaslēmas bun gidat gabag hēn datbēhusur nakelean todaņ gai tokel mai gidato.*

²⁴ Alat lotogol nēsa aGot tokele, galit lutoh tin len gai, ale gai itoh tin len galito. Ale len aNunun gai toviol hēni mai gidato, datolēboii ke gai itoh tin len gidato.

4

ANunun aGot o nanunun gēgēras?

¹ Gamit, notolēmas bun gamit pīsi, samtedēlom nanunun pīsi, be mētebunus sēhot gail ke lovi siGot o lēsavi esan. Mitigol timaienan husur ahai kelkel ur gēgēras isobur lovi lan naut pīsi len navile a pan.*

² Mētolēboi mētbēlēboii ke tovi aNunun aGot maiegai: ideh tokel uri ke aYesu Kristo egām vi vanuan tokad niben, gai evi siGot,

³ wake ideh sakel uri, gai imabe? Gai savi siGot. Evi nanunun atenan tovi enemi seKristo tahtab. Mētosēsēloņ hēni ke atenan tovi enemi seKristo bēgēmai, ale gagai itoh tia len navile a pan.

⁴ Tuhnaturgw gail, mētovi siGot ale mētosēhor ahai kelkel ur gēgēras galenan husur aNunun aGot totoh len gamito esēhor natēmat totoh len alat navile a pan.*

⁵ Ahai kelkel ur gēgēras galenan lovi sinavile a pan, imaienan nasoran salito egām len nēnauan

* **3:23:** Jon 13.34, 15.12, 17 * **4:1:** Deu 13.2-6 * **4:4:** Len naut egai, nēboņ toke, *mētosēhor ahai kelkel ur gēgēras*, namilen ke mētoil gēgat len nakitinan.

sinavile a pan, gol ke navile a pan losəsəlonj hən galito.

⁶ Be ginamito, namtovi siGot, ale alat lotoləboi aGot losəsəlonj hən ginamito. Galevis ləsavi siGot. Galito, ləsəsəlonj hən ginamito, lomətahun ginamito. Husur natgalenan beti, datoləboi datbeləboi səhot aNunun nakitinan mai nanunun nagəgərasan.

AGot evi na-ləmas-buni-an

⁷ Gamit, notoləmas bun gamit p̄isi, dateləmas bun gidat gabag tabtab bathut aGot evi nəkadun na-ləmas-buni-an. Gidat ideh toləmas bun ideh am maienan ikad nəpasian len aGot, eləboi aGot.

⁸ Gidat ideh asike beləmas bun ideh am maienan, gai imabe? Gai saləboi aGot, bathut aGot evi na-ləmas-buni-an.

⁹ AGot eləmas masuṽ hən gidato. Eṽusan na-ləmas-buni-an san təban gidato maiegai ke: esəvat aNatun uluṁñan tosua səbon vi lan navile a pan, hən, len gai, datḅikad nəmauran kitin.*

¹⁰ Na-ləmas-buni-an kitin evi nəsa? Mətunau ke evi na-ləmas-buni-an dattokade nəboṅ dattoləmas bun a Got a? Ao, savi enan. Na-ləmas-buni-an kitin evi na-ləmas-buni-an siGot toləmas bun gidato, tosəvat aNatun hən bətutumav hən nəmauran san gabag, hən ke, len gai, aGot ḅerubət nəsaan sidato gail dan gidato.*

¹¹ Gamit, notoləmas bun gamit p̄isi, aGot beləmas bun gidato len naṽide tomaienan, gidat ṁau datiməsləmas bun gidat gabag.

* **4:9:** Jon 3.16 * **4:10:** Rom 5.8, 10; 1Jon 2.2

12 Səkad avan ideh toris aGot boŋ ideh. Be datbeləmas bun gidat gabag, aGot itoh tin len gidato gol ke na-ləmas-buni-an san len gidato isarpoh buni suŋan toləŋoni.*

13 Datunau ləboii ke dattotoh tin len aGot ale datunau ləboii ke gai totoh tin len gidato husur eviol hən aNunun mai gidato.

14 Ale namtorisi tia ke, namtukel koti ke aTata esəvat aNatun uluŋan hən bilav kuv alat navile a pan dan nəsaan salito.*

15 Avan ideh tokel koti len nəhon nəvanuan gail ke aYesu tovi aNatun aGot, aGot itoh tin len avan enan ale avan en itoh tin len aGot.

16 Ale datoləboi tia na-ləmas-buni-an aGot tokade, toləmas bun gidat həni. Datorin nəlodato len na-ləmas-buni-an enan. AGot evi na-ləmas-buni-an, ale avan ideh totoh tin len na-ləmas-buni-an enan, gai itoh tin len aGot mai aGot itoh tin len gai.

17 Husur natenan, aGot igol ke na-ləmas-buni-an san len gidato isarpoh buni suŋan toləŋoni, hən ke datbikad na-il-buri-an len nəhon nəboŋ aGot bəpəpəhun navoian dan nəsaan. Imaiənan husur len natohan len navile a pan egai, datutoh tin len aGot suŋan aYesu totoh tin len aGot.

18 Namətəhwan ebuer len na-ləmas-buni-an be na-ləmas-buni-an kitin ehut namətəhwan, husur nəpanismen evi nəkadun namətəhwan. Avan ideh tomətəhw len nəpanismen, na-ləmas-buni-an siGot lan səsarəpoh suŋan aGot toləŋoni.

19 Datukad na-ləmas-buni-an bathut a mō aGot eləmas masuŋ hən gidato.

* 4:12: Jon 1.18 * 4:14: Jon 3.17, 4.42

²⁰ Avan ideh ðike, “Noləmas bun aGot,” be emətahun bun nəbathudud nadəlomian ideh, gai evi nəvanuan nalibliboŋan. Husur asike ðeləmas bun nəbathudud nadəlomian ideh torisi tia, imabe eləmas bun aGot gai sarisi? Saləboi ðigole.

²¹ Ale aGot ikel nategai hən gidato ke, avan ideh toləmas bun aGot, timasləmas bun nəbathudud nadəlomian san tu.*

5

Nadəlomian len aYesu, aNatun aGot

¹ Nəvanuan þisi lotodəłomi ke aYesu evi aKристо, aGot totabtabuh lan, galit lukad nəpasian salito len aGot. Ale galit þisi lotoləmas bun gai topasus, loləmas bun ideh tokad nəpasian lan am.

² Datoləboii ke dattoləmas bun anatun aGot gail nəboŋ dattoləmas bun aGot, dattogol nəsa tokele.

³ Bathut datðeləmas bun aGot, dereh datigol nəsa tokele. Ale natgalen tokel gail, ləsədaŋ hən datðigol gail.*

⁴ Husur galit þisi lotokad nəpasian len aGot, loil gəgat dan naŋide tosa gail silat navile a pan, lowin. Nadəlomian sidato evi nədaŋan hən dattoil gəgat dan naŋide silat navile a pan.

⁵ Ase eləboi ðeil gəgat dan naŋide silat navile a pan? Nəvanuan todəłomi ŋai ke aYesu evi aNatun aGot.

⁶ AYesu Kристо evi gai togəm hən ðibaptais len nəwai mai hən nəda han ðisel len nəmatan san. Len

* **4:21:** Mat 22.36-40; Mak 12.28-31; Luk 10.25-28 * **5:3:** Jon 14.15

nəwai mai nəda egəmai.* Savi nəwai hən nəbaptaisan san ɲai be nəwai enan mai nəda hən nəmatan san. Ale evi aNunun aGot tokel koti bathut ke aNunun aGot tovi nakitinan.

⁷ Husur itor enan lukel kot nakitinan,*

⁸ aNunun aGot mai nəwai mai nəda; ale lototor lukel kot natit toɲitoʋ ɲai.

⁹ Len nakotan datodəlom na-kel-koti-an sinəvanuan, be nakitinan hən na-kel-koti-an siGot esəhori husur evi na-kel-koti-an aGot tokel koti husur aNatun ulum̃an.

¹⁰ Imaienan, alat lotoriɲ nəlolit len aNatun aGot lodəlom nəsa aGot tokel koti husur aNatun ale lukad nadəlomian enan len nəlolito. Avil alat ləsadəlom aGot ehum lotoke aGot tolibliboɲ husur ləsadəlom na-kel-koti-an aGot tokele husur aNatun ulum̃an.

¹¹ Na-kel-koti-an imaiegai ke: aGot eviol hən nəmauran vi sutuai mai gidat tia ale nəkadun nəmauran enan evi aNatun ulum̃an.

¹² Alat lotokad aNatun aGot len nəlolito, lukad nəmauran enan; ale alat ləsəkad aNatun ulum̃an aGot len nəlolito, lumabe? Ləsəkad nəmauran enan.*

¹³ Nutos natgalenan van hən gamit məttoriɲ nəlomito len nahəsan aNatun aGot hən mətbeləboii ke məttokad nəmauran vi sutuai.

¹⁴ Gidato, datsəkad nə-lon-uri-an len nəhon aGot ke, datbeusi hən natideh tonor hən naləɲonian san, dereh gai tesəsəloɲ hən gidato.

¹⁵ Ale datbeləboii ke tosəsəloɲ hən natideh dattousi hən, beti datoləboii ke eviol hən nəsa dattousi

* **5:6:** Len nasoruan ta Kris, *baptais* səpat, ike *nəwai* ɲai ale nəvanuan namitisau hən nasoruan siGot lunau ke *nəwai* evi *nəwai* hən nəbaptaisan. * **5:7:** Deu 19.15 * **5:12:** Jon 3.36

həni.

¹⁶ Gə̃beris nəbathudud nadəlomian ideh togol nəsaan, be savi nəsaan togol tomakuv dan aGot, gisor tuṽ mōsi, ale dereh aGot teviol hən nəmauran kitin maii.† Nusor husur nəsaan savi nəsaan togol nəvanuan tomakuv dan aGot, be ikad nəsaan sua togol nəvanuan tomakuv dan aGot vi sutuai, ale nəsakele ke gisor tuṽ mōs galit lotogol enan.

¹⁷ Natit p̄isi ləsanor lovi nəsaan, be ikad nəsaan galevis ləsgol nəmatan, ləsgol ke nəvanuan tomakuv dan aGot vi sutuai.

¹⁸ Datoləboii ke nəvanuan p̄isi lotokad nəpasian salit len aGot, ləsgolgol nəsaan husur aNatun aGot ihavhav hən galito, etəgau gol galito hən gai tosa vəsa masuṽ tovi təmat b̄edədas b̄ibar galito.

¹⁹ Datoləboii ke datovi siGot naut kəmas ke galit am lotosuh len navile a pan lutoh len navəlan gai tosa vəsa tovi təmat.

²⁰ Ale datoləboii ke aNatun aGot togəm tia ale eviol hən naləboian hən datb̄eləboi aGot kitin, ale datutoh tin len aGot kitin, datutoh tin len aNatun ulum̄an, aYesu Kristo. Atenan evi aGot kitin, evi nəmauran vi sutuai.

²¹ Bathut enan, anatumgw gail len nadəlomian, mətələləgau hən gamito dan nagot gəgəras gail.

† **5:16:** Nəsaan togol nəvanuan tomakuv dan aGot evi nəsaan togol nəvanuan tomat vi sutuai.

**Nasoruan siGot len nasoruan ta Uluveu
The New Testament in the Maskelynes language of
Uluveu, Vanuatu
Niutestamen long lanwis Maskelynes blong Uluveu,
Vanuatu.
Le Nouveau Testament dans la langue Maskelynes de
Uluveu, Vanuatu.**

copyright © 2013 Wycliffe Bible Translators, Inc.

Language: Maskelynes

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 18 Apr 2025 from source files dated 31 Aug 2023

cb9da196-fced-5a7c-9540-74db5e4270fd